



(ciep banj 11)

Cungguek lai bae caeuqfaenh gajgwz caeuq laebguh aen diji ceihleix lajmbwn, doenggvaq hengzguh aen leixniemh doxyaeng caezhwnq caemhyungh bae ceihleix lajmbwn, dawzmaenh gij dohbenh cuji caencingq, doinyoengx gozci gvanhaeh bienq ndaej engq minzcuji bae, doinyoengx gaiq hong ceihleix lajmbwn coh aen fuengyiengq engqgya goengcingq hablex bae hwnghat.

Siz Ginbingz youq ndaw baugau biusiq, Cungguek daezok le aen cawjcieng hawj lajmbwn hwnghat, aen cawjcieng hawj lajmbwn ancienz, nyienh caeuq gozci sevei itheij roengzrengz bae guh. Raeuz caensim hemq-heuh, seiqgyaiq gak guk cungj hwnghat gij gyaciz hozbingz, hwnghat, goengbingz, cingqngaih, minzcuji, swyouz daengx vunzloih caezcaemh haenx, sawj gak guk yinzminz engq doxrox doxndiep, swngznyiinh seiqgyaiq vwnzmingz miz lai cungj lai yiengh, aeu vwnzmingz gyaulouz hamj gvaq vwnzmingz haekhawz, vwnzmingz doxhag hamj gvaq vwnzmingz doxdawz, vwnzmingz caez miz hamj gvaq vwnzmingz gag ak, doengzcaez wngqdoi lajmbwn gak cungj nyauxnyex. Gyoengq yinzminz Cungguek nyienh caeuq gyoengq yinzminz seiqgyaiq dazfwngz haicauh aen daengzcog engqgya gyaunde.

Siz Ginbingz daegbied gangj daengz, giengdingh mbouj bienq cienzmienh yiemzhaenq guenj Dangj, doinyoengx aen gunghcwngz hungmbwk guhhung guh' ak aen Dangj seizdaih moq guh haeuj laeg bae

Siz Ginbingz youq ndaw aen baugau Ngeihcib Daih daegbied gangj daengz, giengdingh mbouj bienq cienzmienh yiemzhaenq guenj Dangj, doinyoengx aen gunghcwngz hungmbwk guhhung guh' ak aen Dangj seizdaih moq guh haeuj laeg bae.

Siz Ginbingz vixok, cienzmienh hwnqguh aen gukgya sevei cuji yendaiva, cienzmienh doihaeuj Cunghvaz Minzcuji fukhwng hungmbwk, gij ceiq youqgaenj dwg Dangj raeuz. Dangj raeuz dangguh aen cwnghang Majgwzsh Cuji gwnz seiqgyaiq ceiq hung, yaek itcig cungj ndaejdaengz yinzminz gaenriengz, gyamaenh aen diegvih ciengzgeiz gaemgiengz, itdingh aeu seizseiz cungj singhsag caeuq giengdingh bae gajgez gij nanzdaez aen dangj hung gag miz haenx. Daengx Dangj itdingh aeu geiqmaenh, cienzmienh yiemzhaenq guenj Dangj ciengxlwenx aeu guh roengzbae, Dangj raeuz gag gaj bienq ndei ciengxlwenx aeu guh roengzbae, baenzlawz cungj mbouj ndaej miz yiengh siengfap soengrengz yietnaiq, naetnaiq mbwq guh, itdingh aeu dingnanz mbouj soeng bae doihaeuj cienzmienh yiemzhaenq guenj Dangj, haeujlaeg doihaeuj gaiq hong hungnaek guhhung guh' ak aen Dangj seizdaih moq, doenggvaq Dangj raeuz gag gaj bienq ndei bae dazyinx ndawbiengz bae guh gajnde.

Raeuz aeu doeksaed gij cungjiugouz guhhung guh' ak aen Dangj seizdaih moq, laebcaez aen diji cienzmienh yiemzhaenq guenj Dangj, daj gak fuengmienh doihaeuj gij hong Dangj raeuz gag bienq cinghseuq, gag guh caezciengz, gag gaj bienq ndei, gag rox daezsang, hawj Dangj raeuz ndaej geiq maenh simnduj sawjmingh, seizseiz cungj baenz aen chehsim maenh' ak lingjdauj aen saehnieb sevei cuji miz gij daegsaek Cungguek.

It dwg dawzmaenh caeuq gyaak gij gyonjcomz lingjdauj Dangjuncunghyangh. Laebcaez aen cidu diji Dangj raeuz lingjdauj ndaej bae doengjlamx daengxbuengz, hezdiuz gak

fueng, laebndei aen gihci hengz ndei gij gezcwz baijbouh hungnaek Dangjuncunghyangh, saedbauj daengx Dangj youq cwnghat laebciengz, cwnghat fuengyiengq, cwnghat yenzcwz, cwnghat roenloh fuengmienh caeuq Dangjuncunghyangh baujcz doxdoengz liuxliux, saedbauj Dangj raeuz doxgiet doengjit.

Ngeih dwg itcig mbouj cuengqsoeng yungh Aen Swhsiengj Sevei Cuji Miz Gij Daegsaek Cungguek Seizdaih Moq comz simvunz couq lingzhoenz. Cienzmienh gya' rengz guh' ak gij swhsiengj aen Dangj, lai yunghrengz son' gyaug lijsiengj saenqniemh, dazyinx daengx Dangj geiqmaenh aen cunghci Dangj raeuz, gagrox guh boux giengdingh saenqyiengj caeuq boux lauxsaed hengzguh aen lijsiengj hunggyae gunghang cuji caeuq aen lijsiengj caezcaemh yiengh sevei cuji miz gij daegsaek Cungguek.

Sam dwg laebndei gij cidu gveihfan diji gvendaengz Dangj raeuz gag gaj bienq ndei. Dawzmaenh baengh cidu guenj Dangj, ciug gvicieng guenj Dangj, laeb caezciengz aen diji gamduk Dangj raeuz doengzcaez lingjdauj, gizziz yienghyiengh goq caez, miz giengzi youh ak guh haenx, hawj fag giemqraeh cwnghat liebyawj miz ok cozyung, rap ndei aen cwnghat cwzyin cienzmienh yiemzhaenq guenj Dangj, yungh ndei gij banhfang cazdawz cwzyin.

Seiq dwg laebbaenz aen doih ganbu suciz sang rap ndaej diuz rapnaek minzcuji fukhwng. Dawzmaenh daek caiz caez miz, aeu daek youq gonq, seiq fueng bet baih, yawj caiz yungh vunz, laebhwnj aen yinxyiengq cingqden bae genj vunz yungh vunz, genjaeu boux ganbu ciennieb ak suciz sang youh cunghat cinghseuq dangrap haenx, genj bouxndei boiq bouxak hawj gak gaep lingjdauj banhsuj, gyarengz hawj ganbu ganqbaenz gij cinghsaenz rox doucwngh caeuq gij bonjsaeh guh doucwngh, gikcoi ganbu daihdang dawzrap, hwnjheiq guhsaeh.

Haj dwg dem' ak gij cwnghat gunghnwnz caeuq cujcz gunghnwnz dangjucjcz. Dingmaenh aen yinxyiengq cingxcag haenqrengz guhndei hong gihcwnz, dawz gij dangjucjcz gihcwnz gensez baenz aen candou baujleij maenh' ak ndaej ndeindei saedyienh Dangj guh lingjdauj haenx, gikcoi dangjiengz langh ok gij cozyung daiqdaez guh yienghndei, baujcz aen doih dangjiengz maenhndei caeuq cinghseuq.

Roek dwg dingmaenh aeu yiemz guh cawjdiuh gyarengz bae guh gij hong dawzcingq funghaiq yiemzsuk gijliz. Itcig mbouj cuengqsoeng bae doeksaed gij cinghsaenz bet hangh giengdingh cunghyangh, lienzdaemh gyalag niujcingq caeuq ceihleix gij vwndiz "seiq fung", cunghat niujcingq hingzsz cuji, gvanhliuz cuji, laemxsim buqcauz gij swhsiengj saj daeggiengz caeuq gij hengzsaeh saj daeggiengz.

Caet dwg laemxsim dwkhingz ciengz ciengq haenqrengz naihnanz bae fanj nduknaeuh. Nduknaeuh dwg cungj baeddoeg ceiq yak haih daengz gij rengzmingh caeuq rengzhoenx Dangj raeuz, fanj nduknaeuh dwg yiengh gag gaj bienq ndei ceiq daengzdaej. Cijaeu miz gij diegnamh caeuq diuzgen ndaej mizok nduknaeuh, aen doucwngh fanj nduknaeuh couh yaep ndeu hix mbouj ndaej dingz, itdingh aeu ciengxlwenx guh roengzbae, dingmaenh baenz cingjdaej doi hawj mbouj gamj nduknaeuh, mbouj ndaej nduknaeuh, mbouj siengj nduknaeuh, mbouj yungznyaenx saek di bae fanj nduknaeuh fad hengzyak, baenzbaenz cungj mbouj yungzcingz.

Siz Ginbingz vixok, seizdaih cingq hemqheuh raeuz, yinzminz cingq deqmuengh raeuz, cij miz laemxsim mbouj bienq, ngaem gyauej saedguh, cij doiq ndaej hwnj seizdaih, doiq ndaej hwnj yinzminz. Daengx Dangj itdingh aeu geiqmaenh, dingmaenh Dangj raeuz cienzmienh lingjdauj dwg diuz roen dingmaenh

caeuq hwnghat yiengh sevei cuji miz gij daegsaek Cungguek bietdingh aeu byaij, yiengh sevei cuji miz gij daegsaek Cungguek dwg diuz roen guhbaenz Cunghvaz Minzcuji fukhwng hungmbwk bietdingh aeu byaij, doxgiet buekguh dwg diuz roen yinzminz Cungguek dajcauh lizsij saehnieb hungmbwk bietdingh aeu byaij, gvancez gij leixniemh hwnghat moq dwg diuz roen seizdaih moq guk raeuz hwnghat bienq hung bietdingh aeu byaij, cienzmienh yiemzhaenq guenj Dangj dwg diuz roen Dangj raeuz ciengxlwenx baujcz rengzhoengh, byaij ndei diuz roen ganj gauj moq bietdingh aeu byaij. Neix dwg gij nyinhrox hab gvilwd ceiq youqgaenj raeuz ginggvaq ciengzgeiz saedguh aeundaeh haenx, itdingh aeu engqgya insik, itcig dingmaenh, dawzdaet dawzmaenh mbouj cuengqsoeng, dazyinx caeuq baujcaez aen ruz hung sangsup yiengh sevei cuji miz gij daegsaek Cungguek neix, ndaej swnh rumz buq langh, hengz onj bae gya.

Siz Ginbingz daegbied gangj daengz, doxgiet ok rengz hung, doxgiet cij ndaej hingz. Cienzmienh hwnqguh aen gukgya sevei cuji yendaiva, itdingh aeu hawj ikfanh yinzminz lailai langh ok gij rengz dajcauh hungmbwk. Daengx Dangj aeu gaemmaenh aen gaenbonj moegdik it sim it eiq fugsah yinzminz, laebmaenh aen gvanhdenj gvendaengz ginzung, gvancez diuz lohsienq ginzung, gingqung gij cinghsaenz cauhanduj yinzminz, dingmaenh yienghyiengh vih yinzminz, yienghyiengh baengh yinzminz, daj ndaw ginzung daeuj, baendaengz ndaw ginzung, seizseiz baujcz caeuq yinzminz ginzung lwednoh doxnem, seizseiz ciepsouh yinzminz baebingz caeuq gamduk, seizseiz caeuq yinzminz caez diemheiq, caemh minghyinh, sim doxlien, mboujduenh gyamaenh yiengh daengx guk gak cuz yinzminz daih doxgiet, gyaak gyoengq lwglan Cunghvaz ndaw guk rog guk daih doxgiet, cauxbaenz nga rengzgap maenh' ak caezsim caezhoz guhbaenz aen loqsiengj Cungguek.

Siz Ginbingz vixok, bouxcoz ak, gukgya couh ak. Bouxcoz Cungguek dangdaih seng youq seizdaih ndei, miz aen bingzdaiz gvangqlangh dangqmaz hawj bae langh ok dungxcaiz, miz diuz roennaj ronghsag dangqmaz hawj bae guhbaenz loqsiengj. Daengx Dangj aeu dawz gij hong gvendaengz bouxcoz dangguh hangh hong canloz daeuj guh, yungh gij gohyoz lijln Dangj raeuz bae vujcangh bouxcoz, yungh gij sawjmingh simnduj Dangj raeuz bae gamjciu bouxcoz, guh boux rox aen sim bouxcoz baengzyoux, boux mizsim guh gij hong bouxcoz, boux daiqroen gyoengq bouxcoz. Gyoengq bouxcoz aeu giengdingh mbouj bienq dingq Dangj gangj, riengz Dangj byaij, sim miz loqsiengj youh netsaet guh saeh, gamj siengj gamj guh youh rox guh saeh guh baenz saeh, laebceiq guh bouxcoz ndei seizdaih moq miz lijsiengj, gamj dangrap, gwn ndaej hoj, haengj buekguh, hawj seizcoz youq mwh simndat fwdwd bae cienzmienh hwnqguh aen gukgya sevei cuji yendaiva langh ok dungxcaiz maenh' ak.

Siz Ginbingz gatsat naeuz, Dangj raeuz haenqrengz buekguh dajcauh le aen saehnieb hungmbwk bak bi, hix itdingh ndaej caiq haenqrengz buekguh dajcauh aen saehnieb hungmbwk moq. Daengx Dangj daengx ginh daengx guk gak cuz yinzminz aeu gaenjaed doxgiet youq seiqhenz Dangjuncunghyangh, geiqmaenh gangjndwi nguh guk, saedguh hwnghat guk, giengdingh saenqsim, caezsim caezhoz, ngaem gyauej buekguh, haenqrengz baenaj, vih cienzmienh hwnqguh aen gukgya sevei cuji yendaiva, cienzmienh doihaeuj Cunghvaz Minzcuji fukhwng hungmbwk bae doxgiet buekguh.

(ciug Sinhvaezse)